

植物名實圖考

植物名實圖考卷之三十六

固始吳其濬著

蒙自陸應穀校刊

木類

優曇花

緬樹

龍女花

山梅花

蝴蝶戲珠花

雪柳

太毛毛花

皮袋香

珍珠花

滇桂

野李花

昆明山海棠

野櫻桃

山桂花

馬銀花

野香櫟花

象牙樹

山海棠 又一種

金絲杜仲

栗寄生

炭栗樹

水東瓜木

野春桂

衣白皮

棉柘

樹頭菜

昆明烏木

簸赭子

馬藤

金剛刺

千張紙

雪柳

滇厚朴

山梔子

老虎刺寄生

柏寄生

厚皮香

鐵樹果

滇山茶葉

滇大葉柳

鴉蛋子

金絲杜仲

紅木

蠟樹

桐樹

紫羅花

狗椒

馬椒

大黃連

寄母

刺綠皮





優曇花

優曇花生雲南大樹蒼鬱幹如木犀葉似枇杷光澤無毛附幹四面錯生春開花如蓮有十二瓣閏月則增一瓣色白亦有紅者一開卽斂故名 按滇志所紀大率相同或有謂花開七瓣者撫衙東偏有一樹百餘年物也枝葉皆類辛夷花祇六瓣似玉蘭而有黃蕊外有苞與花俱放如瓣三色綠人皆呼波羅花考白香山集木蓮生巴峽山谷花如蓮色香豔膩皆同獨房蕊異四月始開二十日卽謝不結實其形狀氣候皆相類此豈卽木蓮耶滇近西藏花果名多西方語紀載從而飾之遂近夸誕

許纘曾東還紀程謂優曇和山娑羅皆一物而云花葉無異載
乘今此花祇及一歲之半又園圃分植輒生鄉間摘葉以爲雨
笠非復靈光歸存豈曇花終非可移而姑以木蓮冒之耶抑此
花本六瓣閏月增一爲七而紀乘誤耶否則和山等同爲一種
以肥瘠靈俗而有千層單瓣耶又滇花瓣數一樹之上多寡常
殊應月之瓣或偶值之耶余以所見繪之圖而錄東還紀程於
後以備考其餘耳食之談皆不具

東還紀程大理府山爲靈鷲水爲西洱靈鷲之旁爲和山樹生
和山之麓高六七丈其幹似桂其花白每花十二瓣遇閏則多

一瓣佛日盛開異香芬馥非凡臭味中出一蕊如稗穗俗以爲
仙人遺種主僧惡人剝啄伴置火樹下成灰燼雲南府志優曇
花在城中土主廟內高二十丈枝葉扶茂每歲四月花開如蓮
有十二瓣閏歲則多一瓣亦名娑羅樹昔蒙氏樂誠魁時有神
僧菩提巴波自天竺至以所攜念珠分其一手植之久沒兵燹
中謝肇淞滇略安寧過泉西岸有寺曰曹溪其中有曇花樹一
株相傳自西域來者綠葉白花移葉他種終不復活余謂安寧
之優曇大理之和山土主廟之娑羅其花同其色同其枝幹亦
同特異地而異名耳壬子夏曇花盛開州守馳使折一枝以贈

其花葉枝幹合之載乘果無異也太守乃採柔條徧插於大樹之旁三月後報曰一枝已萌蘖矣余喜甚乃移置盆盎碧葉爛然一根五幹土人驚詡以爲奇瑞

又雲南通志稿載郎中阮福木蓮花說與鄙見合惟雲南督署舊有紅優曇說中以爲皆是白花余訪之信偶買花擔上折枝得紫苞者疑爲紅花也及苞坼則綠白瓣無少異豈制府中之殷紅者亦此類耶李時珍以木蓮初作紫苞似辛夷尤相脗合而又以眞木蘭卽此然則虬幹婆娑者其卽征帆送遠之花身耶阮說尙未之及昔人有謂木蘭與桂爲一種者此樹葉皮味

皆辛微似桂



緬樹

緬樹生昆明人家樹高逾人春時發葉先茁紅苞長數寸苞坼
葉見俱似優曇苞不遽脫裊裊紛披如曳丹羽遙望者皆誤認
朱英倒垂也此樹未訪得真名滇人以物之罕尠者皆呼曰緬
言其來從異域耳有採藥者曰此紅優曇也花紅瓣多居人畏
攀折故匿其名省城亦止此一樹按滇志督署有紅優曇一株
形諸紀詠然第苞紅耳花固白色市中折以售不爲異也此花
旣未早知名瓜期已屆忽忽不復索觀略記數語以示東土好
事者不免爲優曇添一重疑案



龍女花

雲南志龍女花太和縣感通寺一株樹高數丈花類白茶相傳爲龍女所種余訪得繪本其花正白八出黃蕊中有綠心一縷俗謂綠如意花謝時收弄可以催生云又徐霞客遊記感通寺龍女花樹從根分挺三四大株各高三四丈葉長二寸半闊半之綠潤有光花白大於玉蘭亦木蓮之類而異其名